

Uunga siunnersuut: Inatsisartut aalisarneq pillugu inatsisaata allanngortinneqarnera pillugu Inatsisartut inatsisaat nr. xx, xx.xxx-2012-imeersoq

(Sinerissamat qanittumi qaleralinniarnermi pisassiissutit qummut killissaat pillugu aalajangersakkamik ikkussineq)

Saqqummiussineq

(Aalisarnermut, Piniarnermut Nunalerinermullu Naalakkersuisoq)

Siullermeerinnineq

Aalisarneq pillugu Inatsisartut inatsisaanut allannguutissaatut siunnersuut Naalakkersuisut sinnerlugit matumuuna saqqummiutissavara.

Sinerissap qanittuani aalisariutinut pisassiissutinit niuerutigineqarsinnaasunik nammineq pigisanik Naalakkersuisut atuutilersitsinerannut atatillugu qaleralinniarnermi inuit suliffeqarfiilluunniit qanoq annertutigisumik pigisaqarsinnaanerannut tunngatillugu killiliinissaq siunnersuummi siunertaavoq.

Nalinginnaasumik ilisimaneqarpoq pisassiissutinit nammineq pigisanik niuerutigineqarsinnaasunik aalisarnermi aalajangersimasumi atuutilersitsineq pisassiissutit pisinnaasaqarluartunut katersuunneqarnissaannik kinguneqarsinnaasoq.

Inuit suliffeqarfiilluunniit sinerissap qanittuani aalisariutit atorlugit qaleralinniartut aalisarnermi tassani pisassiissutinit tamarmiusunit 5 %-inik pigisaqarsinnaanerit siunnersuutip kingunerissavaa.

Siunnersuummi siunertaavoq pisassiissutinit 5 %-inik qummut killiliinikkut pisassiissutinit pigisat ingerlatsisunut amerlanerpaanut siaruarneqarnissaannik qulakkeerinninnissaq aammalu aalisarnermi aningaasatigut imminut nappassiinnaassuseqarlersitsinissap qulakkeerneqarnissaa.

Aalisarneq pillugu inatsimmi § 15-imi tassunga atatillugu imm. 5 nutaaq ikkunneqassaaq, tassanilu Kalaallit Nunaanni aalisarnermi pisassiissutit qaffasinnerpaaffissaannik killiliineq killilersorneqarpoq. Sinerissap qanittuani qaleralinniarnermi pisassiissutinit nammineq pigisanik niuerutigineqarsinnaasunik aaqquissuussinermut nalinginnaasumik ilassutitut siunnersuut isigineqassaaq.

Ilisimaneqarluarpoq aqutsiveqarfinni Upernavimmi, Uummannami aamma Qeqertarsuup Tunuani sinerissap qanittuani qaleralinniarnermi aaqquissuussaaneq ajornartorsiutaasoq,

aaqqissuussaannermilu ajornartorsiutit taakku aalisartut aalisarnermi tassani peqataasut ilaasa annikitsumik isertitaqartarnerannik ilaatigut kinguneqarput. Taassuma saniatigut aqutsiveqarfinni taaneqartuni aalisagaqassuseq maannakkorpiaq ajornartorsiortinneqarpoq.

Taamaammat siunnersuut una sumiiffinni pineqartuni aaqqissuusaanikkut ajornartorsiutit naleqquttumik pissusissamisoortumillu aaqqiiviginissaat siunertaralugu Naalakkersuisut iliuusissatut isigisaasa ilagaat, tassungalu peqatigitillu peqassutsip ajornartorsiortinneqarnera annikillissalluni.

Tassunga atatillugu ilisimatitsissutigissavara pisassiissutinik nammineq pigisanik niuerutigineqarsinnaasunik aaqqissuussinermik atuutilersitsineq soqutigisaqartut attuumassuteqartut suleqatigalugit Aalisarnermut, Piniarnermut Nunalerinermullu Naalakkersuisoqarfimmi suleqatigiissitaliamit qaleralinnik aqutsinermut pilersaarut tunngavigalugu suliarineqarnikuusoq. Aqutsinermut pilersaarut Naalakkersuit Nunap Immikkoortortaani Periusissiaannut (RUS) atatillugu iliuusissanut Naalakkersuisut aallartitaannut ilaavoq. Naalakkersuisut isumaqavipput siunnersuut sinerissap qanittuani qaleralinniarnermi sumiiffinni aalisartunut iluaqutaasorujussuussasoq. Tassunga peqatigitillugu aalisartut taakku kissaatigigunikku aalisarunnaarnissamut pitsaasunik periarfissaqassapput.

Taamatut oqaaseqarlunga siunnersuut matumuuna Inatsisartunut suliassanngortippara.